



Protocol

Radunanza cumünala dals 17.12.2014

Presidi: Peer-Puorger Victor

Preschaint: 59 votantas e votants

S-chüsà: Leta Steck-Rauch, Men Wieland e Peder Caviezel

Scrutinadurs: Silvio Zini e Fadri Riatsch

Protocol: Luzzi-Barblan Georg

tractandas	tema	respunsabel
16	011 Legislativa Acconsentimaint protocol	
17	020 Administraziun cumünala Preventiv 2015	
18	200 Scoula Institut Otalpin Ftan	
19	021 Administraziun da fabrica Via da velos Ovella - cunfin	
20	011 Legislativa Varia (radunanza cumünala)	

011 Legislativa

16 Acconsentimaint protocol

Il protocol dals 12.11.2014 vegn approvà.

020 Administraziun cumünala

17 Preventiv 2015Preventiv; quint curraint:

Il capo preschainta il quint curraint e manzuna impustüt posiziuns importants ed adattamaints in congual cul on scuors. Il quint curraint prevezza entradas da fr. 9'967'500.00 ed expensas da fr. 9'758'500.00, resulta ün guadogn da fr. 209'300.00.

Davart da la radunanza manzuna Duri Janett l'importanza da realisar ün ascensur per la sala polivalenta a Tschlin per ch'eir la gliעד attempada haja la pussibilità da rivar sgür in sala. Il cumün piglia cogniziun da quista dumonda. La radunanza acconsentischa cun gronda majorità il quint curraint pel on 2015.

Unica resalva es la posiziun a regard il credit da fr. 75'400.00 pel Institut Otalpin chi vegn trattada separadamaing a quista radunanza.

Preventiv ; quint d'investiziuns :

Il quint d'investiziun prevezza entradas da fr. 685'200.00 ed expensas da fr. 2'759'900.00. Gronds progets previs pel on 2015 sun la chadafö da la chasa da scoula a Ramosch, punts penduossas illa Val Sinestra, la via da velos Vinadi – cunfin, la sanaziun (1.etappa) da la via da Bügl Grond a Vnà, il proget per la via da Plan da Muglin a Ramosch, maschinas per il servezzan da lavur a Tschlin, la chnalisaziun Sot Borgia – Quadra Secha a Ramosch, recipiaint da sablun sarinera Ramosch, sanaziun repairs Martina, proget sanaziun via Alp Tea – la Zipla Tschlin, s-chodamaint areal Quadra Secha a Ramosch.

Armon Mayer, respunsabel per la part pumpiers illa suprastanza, infuormà a la populaziun a regard las investiziuns previsas davart dal corp da pumpiers. Il capo repassa il quint d'investiziuns in detagl. Davart da la radunanza aintran diversas dumondas chi pon gnir scleridas. Posts da discussiun sun l'investiziun da la nouva chadafö illa sala polivalenta a Ramosch, il s-chodamaint il areal Quadra Secha, la cumprita d'ün ulteriur tractor cumünal.

A regard las investiziuns quai chi riguarda la planisaziun cumünala as dessa chattar üna buna soluziun eir per la fracziun da Tschlin, uschè chi'd es avant man terrain per fabricar, manzuna Jachen Andrighetti.

Jon Pitschen Janett ha let ils protocols da la suprastanza, cha talla ha refüsà la dumonda da realisar üna tualetta per la bar chi's rechatta immez Tschlin. El propuona a la radunanza da far quist'investiziun. Davart da la radunanza sustegnan divers quista proposta. Davo intimada discussiun decida la radunanza d'integrar quist'investiziun cun 41 cunter 12 vuschs. L'import per la realisaziun s'amunta sün fr. 70'000.00. Per finir acconsentischa la radunanza il quint d'investiziuns cun gronda majorità.

200 Scoula

18 Institut Otalpin Ftan

Davo cha la radunanza es gnüda infuormada in detagl dal capo cumünal ed implü eir dal mainagestiu da la PEB Rico Kienz, decida talla cun 41 cunter 5 vuschs dad acconsentir il credit da fr. 75'400.00. Dapais ch'our dal ravuogl as sainta üna tscherta skeptica causa l'andamaint da fin hoz il Institut Otalpin, sun ils preschaints consciaint da l'importanza d'üna scoula media in nossa regiun.

021 Administraziun da fabrica

19 Via da velos Ovella - cunfin

Cul possessur dal terrain in vicinanza dal En as haja chattà üna buna soluziun per barattar il terrain, uschè chi sarà pussibel da transir sülla via da velos sco previs a partir da Martina lung il stradun, davu il mür da serra lung l'En fin a Vestmezza, ingio cha'l traiget vegn collià cun quel da l'Austria. Il capo preschainta il contrat da barat cun sar Peter Senn da Fond. La radunanza cumünala acconsentischa cun gronda majorità il contrat da barat.

011 Legislativa

20 **Varia (radunanza cumünala)**

Suot varia piglia il capo l'ocasiun per infuormar a regard il tagl forestal in vicinanza dal bain Zuort. Il possessur dal bain Zuort nun es perinplet cul tagl previs. Davart dal cumün sun gnüdas consultadas ulteriuras instanzas chi han tut posiziun in merit. Actualmaing nu vegna amo taglià per sclerir la situaziun. Puchà esa stat, cha'l possessur ha impedi als collavuratur da transir sülla via, cun metter üna maschina immez la via, ün agir inacceptabel.

Implü sun ils preschaints gnüts infuormats cha sül traiget da Vnà in direcziun Griosch/Prà San Peder sun gnüts allontanats dad incuntschaints ils pösts chi serran la via. Il cumün ha fat üna denunzcha pro la pulizia chantunala.

Per finir vegn infuormada la radunanza cha'l mainascoula es gnü dispensà da sia lavur a partir dals 15.12.2014. Actualmaing es il cumün landervia a trattar cul mainascoula sur da seis ingaschamaint pro'l cumün da Valsot.

7556 Ramosch, 18.12.2014



Il capo:

Il manader administraziun: